



Urlaub doaheim

Ech verstoa dech, leve Frau, et döt arich weh  
Du wet gern moa wat annerscht wie det Sejerland seh  
Wet lever moa fleje, ab fort e de Sonn  
On säst, dat mer oos dat e moa gönne konn.

Derlebst wedde moa doa onne noa Malle  
Nur wat wedde da e dä Touristenfalle  
De wet moa wat do, wat mer doaheim net ka  
Frau, näwer dir stehrt doch din Ballerma

Derweje prakeziern moa, mr bliewe lever doaheim  
Dat es min Wocheplan, wie mer oos he erfreun

Mondach, dr erschte Urlaubsdach, fänge mr ganz langsam a  
Doa fahrn mr ob de Lützel bet der Isebah  
Giller, Sprongschanze, Ginsburch, en Kännche Kaffee e Erebröcke  
On hernea durch det Helchemicher Tunell weher gemötlich zeröcke

Am Deesdach ha mr da weer wat vor  
Mr fahrn bem Biggedampfer wie em voriye Joahr  
Mr gugge ob dr Damm on de Attahöhle noch stoa  
On da esse mr Iss em Schloss Schnelleberch  
Nu mache moa en anner Gesecht on guck net so zwersch

Am Meddwoch goa mer moa zesame nom Frisör  
Doa beste onnerm Ballong on din Kopp wird schör  
Ech suern e dä Zitt bet de anner Lü  
Or gugge Beldcher e dr Neue Revue

Över dä Oavend kaste da frej verföje  
Hoarl din Freundin herbij, on da veel Vergnöje  
Wat er da macht on schwätzt, dat sall mech net jugge  
A däm Oavend well ech min Roah ha on Championsleague gugge

Dr Donnerschdag ha mr romantisch for oos allei  
Kaffeetrenke em Bedde bes Uhrer ei  
Doafor bestelln ech Deilcher on Kooche  
On oawends Kerzeschin-Dinner e dr "Ongelsgrow" e Booche

Am Fridach fahrn mr nom "Nordsee" on esse fresche Fösch  
Da setze mr alt weher am gedeggde Dösch  
Noamedachs haue mr oos am Serlwicher Wejer platschdich e de Sonn  
Ech riewe dech och eh, de weisst, wie sexy ech dat emmer kon  
Am Oawend bet Sonn em Herze goa mer fröh et Bedde  
Da warde moa ab, wat ech doa noch ze bere hädde

Am Sonnoavend fahrn mr noa Dortmund, e goorer Tradition  
Du gehrst ekaufe e dr Stadt on ech et Stadion  
On wenn da gewonne hät min BVB  
Do mr din Kassezerelcher och ne me weh

Am Sonnich, dat versprech ech, goa ech moa bet e de Kirch  
Det Esse spendiern ech herno ob dm Kennelsberch  
Vam Turm us sūt mer mänchmoa en Has, en Fochs or en Reh  
Bi goorem Wäer kaste och dr Dom e Köln seh

Dr Dom wede gern e moa uss der Nöjte begugge  
Weltkulturerbschaft, njoa, dat es och woahr  
Dän besoch mer da e oosem Urlaub em annern Joahr